

## **Siunnersuummut oqaaseqaatit**

### **Oqaaseqaatit nalinginnaasut**

#### **1. Aallaqqaasiut**

##### **Inatsisissatut siunnersuutip tunngavia**

Inuit ataasiakkaat pillugit paasissutissanut tunngatillugu isumannaatsuunissaq Inatsisartut Naatsorsueqqissaartarfik pillugu inatsisaanni nr. 11, 29. oktober 1999-imeersumi § 13-ip ilanngunneratigut sukaammerneqarpoq. Aalajangersakkamut tunngaviupput pisortat naatsorsueqqissaartarnerat pillugu FN-ip tunngavissiai 14. april 1994-imi akuersissutigineqartut aamma EU-p peqqussutaa, nunat EU-mut ilaasortaasut inuit pillugit paasissutissanik nalunaarsuisarneq atuisarnerlu pillugit inatsisaasa annertuumik allangortiterneqarnerannik kinguneqartoq. Allangortiterinerup taassuma paasissutissanik nunanut pingajuusunut ingerlatitseqqittarneq pillugu maleruagassanik sukaterinermik arlalitsigut kinguneqassangatinneqartup taamatuttaaq Kalaallit Nunaannut kalluaanissaa peratarsinnaasimavoq.

Inuit suliffeqarfiillu pillugit paasissutissanik, ilisimatusarnissaq inatsisinilluunniit piareersaannissaq siunertaralugu atuisinnaanissaq pillugu Naatsorsueqqissaartarfik akuttunngitsunik saaffigineqartarpoq. Ilisimatusartut inuit suliffeqarfiilluunniit pillugit paasissutissanik sukumiisorujussuarnik atuisinnaanissartik kissaatigisarpaat. Taamatuttaaq aamma pisortat oqartussaasut maleruagassanik atuuttunik imaluunniit inatsisit nutaat kingunerisinnaasaannik naliliiniarnerminni paasissutissat sukumiisut atorsinnaanissaat kissaatigisarpaat.

Inuit pillugit paasissutissat Naatsorsueqqissaartarfimmut nalunaarutigineqartartut, Inatsisartut Naatsorsueqqissaartarfik pillugu inatsisaata saniatigut pisortat oqartussaasut nalunaarsuiffii pillugit inatsimmi aalajangersaaffigineqarput. Inatsit taanna naapertorlugu suliarineqarnikuupput Naatsorsueqqissaartarfiup nalunaarsuiffii pillugit nalunaarsuinerminni malittarineqartussat. Nalunaarsuinerminni malittarineqartussat taakku ilaat, nalunaarsuinerminni nakkutilliisoqarfiup (Datatilsynip) akuersissuteqarneratigut nalunaarsuiffinnut, naatsorsueqqissaarnissamut ilisimatuussutsikkulluunniit atugassatut immersorneqarsimasunut ingerlatitseqqisarnissamik periarfissiipput. Datatilsynip akuersissutinik taamaattunik tunniussinermini assigiinngitsunik piumasaaqateqartarpoq, matumani aamma akuersissutinik peqartut paasissutissanik inuit kikkunerinik takussutissiisinnaasunik ingerlatitseqqittannnginnissaat pillugu, aammalu paasissutissat siunertanut allanut, paasissutissat tunniunneqarneranni siunertaasunit allaasunut atorneqanginnissaat soorluttaarlu paasissutissat suli allanut ingerlateqqinneqannginnissaat pillugit piumasaaqatit.

Inatsisartut Naatsorsueqqissaartarfik pillugu inatsisaanni § 13-ip, pisortat oqartussaasut nalunaarsuiffii pillugit inatsit tunngavigalugu ukiorpassuarni periuserineqartoq malillugu inuit pil-

lugit paasissutissanik, ilaatigut ilisimatusarnernut atugassanik ingerlatitseqqittarsimanerup ingerlatiinnarneqarsinnaaneranut aporfiusinnaanera maanna apeqquserneqarsimavoq. Tunngavissaq pillugu apeqqutaalersoq eqqartuussivinni misilinneqarsimangilaq allatulluunniit akuerisaanera pillugu aalajangiiffigineqarsimanani. Inatsisissatut siunnersuut manna qularutiginnilernermit aqqissutissatut siunniussaavoq aammalu Inatsisartut Naatsorsueqqissaartarfik pillugu inatsisaata ukiorpassuarni peruserineqarsimasumik, pisortat oqartussaasut nalunaarsuiffii pillugit inatsit naapertorlugu ineriartorsimasumik ingerlatsiinnarsinnaanermut aporfionginneranik erseqqissaaniarneruvoq.

Danmarkimi Danmarks Statistikip ilisimatusarnernut aqqissuussineq aqqutigalugu suliffeqarfiit ilisimatusarfiusutut akuerisaasut paasissutissanik, ilisimatusarnernut misissueqqissaarnernullu aalajangersimasunut atugassaannik atugassittarsimavai. Inuit ataasiakkaat pillugit paasissutissanik ilisimatusartunut atugassiinermi paasissutissat kimut tunngasuuneri paasineqarsinnaajunnaarsagaasarput, taamaalillutik inuit, suliffeqarfiit najukkat il.il. takuneqarsinnaajunnaarsinneqartarlutik.

## **2. Siunnersuutip imarisai pingaernerit**

Naatsorsueqqissaartarfiup paasissutissanik ilisimatusarnernut inatsisinilluunniit piareersaanernut atugassanik ingerlatitseqqittarnera pillugu qularutiginnilersimaneq allannguutissatut siunnersuutikkut aqqinniarneqarpoq.

Naatsorsueqqissaartarfiup inuit ataasiakkaat suliffeqarfiillu pillugit paasissutissanik ilisimatusarnermi inatsisinilluunniit piareersaanermi atorineqartussanik ingerlatitseqqissinnaanera inatsisissatut siunnersuutikkut erseqqissarneqarpoq. Naatsorsueqqissaartarfiup ilisimatusarnernut aqqissuussinernik akuersissuteqartarnermilu aqqissuussinernik, Danmarks Statistikituulli pilersitsisinnaalernissaa inatsisip allanngortinneqarneratigut siunniussaavoq.

Ilisimatusartut allallu Naatsorsueqqissaartarfiup paasissutissaatai atorlugit sulisussat tatiginasutsimut, toqqortarinninnissamut tunngasut pillugit kiisalu paasissutissanik ingerlatitseqqinnissap inerteqqutaanera pillugu piumasaaqatiniq ilisimatinneqarnissaat piumasaaavoq. Tassa imaappoq Naatsorsueqqissaartarfiup aamma suliffeqarfiit, naalakkersuisoqarfiit il.il. paasissutissanik pisut akornanni, akuerisaaneq pillugu ingerlatitseqqittarnerillu pillugit allaganngorlugu isumaqatigiissusiortoqartarnissaa naatsorsuutaavoq. Aamma paasissutissanik ingerlatitseqqinnissaq pisortat oqartussaasut nalunaarsuiffii pillugit inatsit malillugu pissappat Datatilsyni akuersisinneqaqqaartassaaq.

Aammattaaq siunnersuutigineqarpoq Naatsorsueqqissaartarfik paasissutissanik misiligutitutigusanik immikkoortitsisinnaassasoq. Pisortat oqartussaasut il.il., ilaatigut suliffeqarfiit misissueqqissarnermik suliaqartartut il.il. ikiortigalugit, pissutsit assigiinngitsut innuttaasunut tunngasut akuttunngitsumik misissuiffigisarpaat. Assersuutit taaneqarsinnaavoq inuit peqqissusiannik misissuineq. Misissuinissaq taamaattoq ingerlanneqarsinnaassappat innuttaasut misissuinissamut pineqartumut peqataatitassat naammattut toqqarneqartussaapput. Siunnersuutip siunertaraa Naatsorsueqqissaartarfiup, innuttaasut peqataasussatut toqqagassat naam-

mattut toqqarneqarnissaanni inuttut normut pisariaqartut atugassiissutigisassagai. Taakkunaniissaaq paasissutissanik ingerlatitseqqinnissaaq pisortat oqartussaasut nalunaarsuiffii pillugit inatsit malillugu pissappat Datatilsyni akuersisinneqaaqqaartassaaq.

Peqqinnissaqarfik innuttaasut inunngorneri pillugit nalunaarutit imaluunniit toqneri pillugit paasissutissat eqqortuunerinik aalajangiisussaatiilluni ilaanneeriarluni Naatsorsueqqissaartarfimmit ikiorneqarnissamik qinnuteqartarpoq. Naatsorsueqqissaartarfiup taamatut ikiuisarnerminik ingerlatsiinnarsinnaanissaa siunnersuutaavoq.

Naatsorsueqqissaartarfiup siulersuisuisa paasissutissanik ingerlatitseqqittarnermi suleriaatsinik erseqqinnerusunik aalajangersaanissamut piginnaatinneqarnissaat siunnersuutaavoq. Paasissutissanik ilisimatusarnissamut inatsisinilluunniit piareersaanissamut atugassamik tunineqarnissamik qinnuteqaatit pisuni qanoq ittuni Naatsorsueqqissaartarfimmit itigartinneqarsinnaanerat siulersuisut ilaatigut erseqqissarsinnaavaat.

Siunnersuut inatsimmut atuuttumut sanilliullugu	
Oqaasertai atuuttut	Siunnersuut
	<b>§ 1</b>
	Inatsisartut Naatsorsueqqissaartarfik pillugu inatsisaanni nr. 11, 29. oktober 1999-imeersumi makku allannguutigittinneqarput:
<b>§ 13.</b> Inuit ataasiakkaat suliffeqarfiilluunniit ataasiakkaat pillugit paasissutissat Naatsorsueqqissaartarfiup §§-ini 10 aamma 11 naapertorlugit pissarsiarisai allanut ingerlateqqinneqassanngillat.	<p><b>1.</b> § 13-imi <i>imm. 2-miit 6-imut</i> nutaatut ilanngunneqarput:</p> <p><i>”Imm. 2.</i> Imm. 1-imi aalajangersagaq atuutissanngilaq paasissutissat ilisimatusarnermi inatsisinilluunniit piareersaanermi atugassatut ingerlateqqinneqarpata, paasissutissat ilisimatusarnerup inatsisinilluunniit piareersaanerup pineqartup pisinnaanissaanut pisariaqartinneqarpata.</p> <p><i>Imm. 3.</i> Imm. 1-imi aalajangersagaq aamma atuutissanngilaq inuit normuunik, innuttaasut pillugit misissuilluni naatsorsuinerni atorneqartussamik misiligutitut makitsinerni.</p> <p><i>Imm. 4.</i> Imm. 1-imi aalajangersagaq aammattaaq atuutissanngilaq paasissutissat tassaappata peqqinnissaqarfiup, inuit inunngornerinik nalunaarutit sumillu toqquteqarneri pillugit paasissutissat eqqortuunerannik qulakkeerinissamut atugassai.</p>

	<p><i>Imm. 5.</i> Imm. 2 3 naapertorlugu ingerlatitseqqinnermi inuit ataasiakkaat suliffeqarfiillu ataasiakkaat aqqi, najugaat, inuttut normui, suliffeqarfittut normui paasissutissallu assingusut, inuup suliffeqarfiulluunniit kinaanerani takussutissiisinnaasut piarneqarsimasapput.</p> <p><i>Imm. 6.</i> Paasissutissanik imm. 2-miit 4-mut pineqartunik ingerlatitseqqittarnermi suleriaasissat erseqqinnerusut Naatsorsueqqissaartarfiup siulersuisuisa aalajangersarsinnaavaat, matumani aamma aalajangersarsinnaallugu ilisimatusarnermi atugassanik ingerlatitseqqittarnek taamaallaat pisinnaasoq, ilisimatusarnek pineqartoq pillugu suleqatigiinnis-saq ilisimatusarfimmut Kalaallit Nunaanneersumut nunanilluunniit avannarlermeersumut akuerisaasumut isumaqatigiissutigineqarpat.”</p>
	<p style="text-align: center;"><b>§ 2</b></p> <p>Inatsisartut inatsisaat 1. januar 2016-imi atortuulissaaq.</p>

### **3. Pisortanut aningaasatigut allaffissornikkullu sunniutissai**

Siunnersuut Naatsorsueqqissaartarfimmi allaffissornikkut suliassanik annikillisisilaassangatinneqarpoq, tassa ilisimatusarnermik akuersissuteqartarnermillu aaqqissuussinernik pilersitsinerup kingunerisaanik.

Siunnersuulli pisortanut aningaasatigut sunniuteqassangatinneqanngilaq.

### **4. Inuussutissarsiutinik ingerlataqartunut aningaasatigut allaffissornikkullu sunniutissai**

Siunnersuutip inuussutissarsiutinik ingerlataqartunut sunniuteqangaarnissaa naatsorsuutigineqanngilaq.

**5. Avatangiisinut, pinngortitamut inuillu peqqissusiannut sunniutissai**

Siunnersuutip avatangiisinut aamma/imaluunniit pinngortitamut sunniuteqangaarnissaa naatsorsuutigineqanngilaq.

Aamma siunnersuutip inuit peqqissusiannut sunniuteqarnissaa naatsorsuutigineqanngilaq.

**6. Innuttaasunut sunniutissai**

Siunnersuutip innuttaasunut sunniuteqangaarnissaa naatsorsuutigineqanngilaq.

**7. Sunniutissai pingaarutillit allat**

Siunnersuutip pingaarutilinnik allanik sunniuteqarnissaa naatsorsuutigineqanngilaq.

**8. Oqartussaasunik kattuffinnillu il.il. tusarniaaneq**

Siunnersuut 2015-imi piffissami 2. junimiit 3. julimut ukununga tusarniaassutigineqarpoq:

SIK, Sulisitsisut (Grønlands Erhverv), NUSUKA, KANUKOKA, Naalakkersuisut Siulittaasuata Naalakkersuisoqarfia, Aatsitassanut Ikummatissanullu Naalakkersuisoqarfik, Inuussutisarsiornermut, Suliffeqarnermut Niuernermullu Naalakkersuisoqarfik, Peqqissutsimut Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Ilaqutariinnermut, Naligiissitaanermut Isumaginninnermullu Naalakkersuisoqarfik, Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik, Pinngortitamut, Avatangiisinut Inatsisinillu Atuutsitsinermut Naalakkersuisoqarfik aamma Ineqarnermut, Sanaartornermut Attaveqarnermullu Naalakkersuisoqarfik, kiisalu aamma Naalakkersuisut internetikkut tusarniaaviatigut.

Tusarniaanermi akissutisiffigineqarput Sulisitsisut (GE), KANUKOKA, Naalakkersuisut Siulittaasuata Naalakkersuisoqarfia, Peqqissutsimut Naalakkersuisoqarfik, Ilaqutariinnermut, Naligiissitaanermut Isumaginninnermullu Naalakkersuisoqarfik, Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik, Pinngortitamut, Avatangiisinut Inatsisinillu Atuutsitsinermut Naalakkersuisoqarfik aamma Nunatsinni Nakorsaaneqarfik.

Tusarniaanermi akissutigineqartut imaattunik oqaaseqaateqarfigineqarput:

Inunngortoqarneranik aamma sumik toqquteqartoqarneranik nalunaarsuiffimmi paasissutissat eqqortuunissaat qulakkeerumallugu, Naatsorsueqqissaartarfillu paasissutissanik taartigeeqati-giittoqartarnerata pinngitsoorani allassimanissaa Nunatsinni Nakorsaaneqarfiup oqaatigaa.

*Siunnersuut malinneqarpoq, inatsisissamullu ilanngunneqarluni. Nunatsinni Nakorsaaneqarfik taaguummi "peqqinnissaqarfik"-mi pineqartunut ilaasutut matumani isigineqarpoq.*

KANUKOKA-p § 13-imi allannguutit akerlilerfissaqartinnginnerarpai, inuilli pillugit paasisutissat isertuussassaanerat pingaartuusoq peqatigitillugu erseqqissaatigaa, siunnersuummilu § 13, imm. 5 eqquutsinniarneqartussaananerarlugu.

Tusarniarneqartut allat tusarniaanermi akissuteqartut siunnersuummut oqaaseqaatissaqanngilat.

**Aalajangersakkanut ataasiakkaanut oqaaseqaatit***§ 1-imut*

*Nr. 1-imut (imm. 2-6).*

Imm. 2.

Siunnersuutaavoq paasissutissanik ilisimatusarnermi inatsisinilluunniit piareersaanermi atugassanik ingerlatitseqqittoqartarnissaanut tunngavissiisoqarnissaa, paasissutissat ilisimatusarnerup inatsisinilluunniit piareersaanagerup pineqartup pisinnaanissaanut pisariaqartinneqarpata.

Ingerlatitseqqinneq paasissutissanik kinaassusersineqarsinnaanngitsutut taaneqartunik imaqarsinnaavoq, tak. ataani imm. 5 pillugu.

Ilisimatusarneq tassaatinneqarpoq ilisimaneqareersut amerlisarniarlugit aqqissuussaasumik tunngaveqarluni sulinermik ingerlatsineq. Ilisimatusarneq nutaarsiassaqaartitsissaaq. Ilisimatusarneq tunngaviusumik ilisimatusarnermut ilisimatusarnermillu atuinermut agguataarneqarsinnaavoq.

Inatsisunik piareersaaneq tassaatinneqarpoq Namminersorlutik Oqartussani naalakkersuisoqarfiit inatsisini maleruagassanik, nalunaarutinik, kaajallaasitanik assigisaannillu nutaanik pisariaqaartitsisoqarneranik naliliinissaaq aammalu maleruagassat allanngortinneqartut kingunerisaannik qulaajaanissaaq siunertaralugit sulinerat.

Paasissutissanik ingerlatitseqqinnissaaq pisortat oqartussaasut nalunaarsuiffii pillugit inatsit malillugu pissappat Datatilsynip akuersisinneqaqqaartarnissaa piumasaqaataavoq.

Imm. 3.

Siunnersuutigineqarpoq Naatsorsueqqissaartarfik paasissutissanik misiligutitut tigusanik immikkoortitsisinnaassasoq. Siunnersuutip kingunerissavaa Naatsorsueqqissaartarfiup, innuttaasut peqataasussatut toqqagassat naammattut toqqarneqarnissaanni inuttut normut pisariaqartut atugassiissutigisinnaassagai. Misiligutissanik tigusinermi toqqammavissat tunngaveqarluartuussapput. Assersuutit makkua maleruagassamut pingaarnermut akerliunngitsut toqqammavissaapput tunngaveqarluartut:

Arnaaneq/angutaaneq, ukiut, tikissimasut/aallarsimasut, nunamit allamit/nunamut allamut nuuttut, nunap ilaani sumiiffik (najugaralugu imaluunniit suliffigalugu), naalagaaffinnut innuttaassusillit, nunanit allanit nunasisuuneq, suliaq (suunera, atorfik, inuiaqatigiinni aningaasarsiornikkut sumi inissisimaneq), ilinniagaq, aningaasarsiat, ineqarnermut tunngasut, angerlarsimaffimmi ikiorteqarneq, pinaveersaartitsilluni angerlarsimaffinnut pulaartarneq, meeqqanik ulluunerani paaqqinniffiit suuneri, qamutitik motoorilinnik pigisaqarneq.

Paasissutissanik ingerlatitseqqinnissaq pisortat oqartussaasut nalunaarsuiffii pillugit inatsit malillugu pissappat Datatilsynip akuersisinneqaqqaartarnissaa piumasaqaataavoq.

Imm. 4.

Inunngortoqarneranik nalunaarutit aamma toqputigineqartut pillugit paasissutissat tutsuiginartuunissaat il.il. qulakkeerumallugu siunnersuutaavoq Naatsorsueqqissaartarfik paasissutissanik peqqinnissaqarfimmut ingerlatitseqqissinnaassasoq.

Innuttaasut inunngortarneri toqusarnerilu pillugit paasissutissat eqqoqqissaartuunissaat siunertaralugu Naatsorsueqqissaartarfiup Nunatsinni Nakorsaaneqarfimmik suleqateqarnissaa pisariaqarsinnaavoq. Paasissutissatigut tunngavissat suunngitsuarannguanilluunniit amigaateqarpata tamanna, assersuutigalugu naalungiarsuit toqusarnerat pillugu eqqunngitsunik paasissutissaateqartoqarneranik kinguneqarsinnaavoq. Paasissutissat pigineqartut pitsaasuunissaat, paasissutissat paasissutissaasivinnit arlalinneersut atornerisigut qulakkeerneqassaaq.

Imm. 5.

Siunnersuutaavoq imm. 2 naapertorlugu paasissutissanik ingerlatitseqqinneq paasissutissanik kinaassusersineqarsinnaanngitsutut taaneqartunik imaqarsinnaasoq. Paasissutissat kinaassusersineqarsinnaanngitsut tassaapput kinaanermut toqqaannartumik paasissutissaasinnaasut tamarluinnarmik ingerlateqqinneqannginnerminni ilisarnarunnaarsagaasut. Paasissutissat toqqaannartumik kinaassusersinninnissamut atorineqarsinnaasut tassaapput inuttut normut, suliffeqarfittut normut, atit, najukkat paasissutissallu assigisaat, suliffeqarfiup inuulluunniit aalajangersimasup toqqaannartumik kinaassusersinissaanut atorineqarsinnaasut.

Paasissutissat kinaassusersineqarsinnaanngitsut paasissutissanit ilisarnarunnaarsakkanit allaassutigaa, paasissutissanik tiguisut paasissutissat tigusatik paasissutissallu allat ilaanneeriartutik naleqqersuussinnaasarmatigik, tassuunakkullu inuup suliffeqarfiulluunniit kinaassusia annerusumik minnerusumilluunniit tunngavilimmik ilimatsaassinnaallugu. Paasissutissat atornerlunneqarnissaa pinaveersaartinniarlugu naatsorsuutaavoq Naatsorsueqqissaartarfiup aamma suliffeqarfiit, naalakkersuisoqarfiit il.il. paasissutissanik pisut akornanni, akuerisaaneq pillugu ingerlatitseqqittarnerillu pillugit allaganngorlugu isumaqatigiissusiortoqartassasoq naatsorsuutaavoq.

Naatsorsueqqissaartarfiup paasissutissanik ingerlatitseqqittarnera tatiginninnermik tunngaveqarpoq paasissutissanillu tigusaqartut nipangiussilluinnartussaataallutik, ilaatigut tak. suliasat suliarineqartarnerat pillugu inatsimmi § 27.

Imm. 6.

Siunnersuutaavoq Naatsorsueqqissaartarfiup siulersuisui paasissutissanik, imm. 2-miit 4-mut naapertorlugit ingerlatitseqqittarneq pillugu erseqqinnerusunik maleruagassiornissamut piginnaatinneqassasut. Paasissutissanik ilisimatusarnissamut inatsisinilluunniit piareersaanissamut



atugassanik ingerlatitseqqittoqarnissaanik qinnuteqaatit pisuni qanoq ittuni Naatsorsueqqis-saartarfimmit itigartinneqarsinnaanerit siulersuisut ilaatigut erseqqissarsinnaavaat.

Ilisimatusartut paasissutissanik tunineqassagunik ilisimatusarfimmik Kalaallit Nunaanniittu-mik nunanilluunniit avannarlerniittumik akuerisaasumik suleqateqarnissamik isumaqatigiissu-teqarsimanissaat siulersuisut ilaatigut maleruagassatut aalajangersarsinnaavaat. Akuerisaasu-tut isigineqartut ilaatigut tassaapput ilinniarfiit ilinniakkanik ilisimatusaatitut ingerlanneqartu-nik, Kalaallit Nunaanni nunalluunniit avannarliit arlaanni allami pisortanit akuerisaasunik ne-qerooruteqartut. Soorlu suliffeqarfiit internetimiittut ilinniaqqiffiusumik ilinniarfiunerarlutik nittarsaattut akuerisaasutut isigineqassanngillat, ilinniakkat il.il. neqeroorutigisaat Kalaallit Nunaanni nunalluunniit avannarliit arlaanni allami pisortanit akuerisaanngippata. Ilinniarfiit ilisimatusarfiusutut isigineqartut tassaapput universitetit, ilisimatusarfiit imaluunniit ilinniar-fiit allat, ilisimatuussutsikkut teknikkikkullu ilisimasat, matumani aamma inuit, kulturi inuia-qatigiillu pillugit ilisimasat annertusarnissaannik siunertaqarluni ilisimatusarnermik ineriartor-titsinermillu aaqqissuussaasumik ingerlatsiffiusut – kiisalu ilisimasat pioreersut tunngavigalu-git qanoq atuisoqarsinnaaneraniq nutaaliorfiusut.

Nunat avannarliit tassaapput Sverige, Danmark, Finland, Norge, Island, Savalimmiut aamma Ålandip Qeqertai.

#### *§ 2-mut*

Inatsisartut inatsisaata 1. januar 2016-imi atortuulernissaa siunnersuutaavoq.